

樂志堂文集

樂志堂文續集卷一

南海 譚 瑩玉生撰

聞雁賦

雲斂金閭月明銀漢撲霜氣於海隅攬風聲於天半人
習靜以蕭閑雁流哀而續斷長劒獨撫短檠猶燦如聽
苦吟如聆永歎爾其違尋暑避初寒起北地以軒翥蒞
南土以盤桓晝聯翩而極遠夜警衛以求安蘆花明而
並宿菰米熟以加餐虛弓之下亦偶微繳之施儘難謂
羽儀之特盛感愁思以無端嘯侶江潯憐秋又深櫓聲
遲而莫辨鐙影暗以誰尋曙光矍矍暝色沈沈湘水巴

陵之路漁陽上谷之心水碧沙明而欲落風嘹月唳以

誰禁數行高韻幾陣清音孰辨閨黎之字

見埤雅廣要

宛然

微子之琴

見新論

有怨必聞有聞彌苦幽咽胡笳森嚴戍

鼓迴異破曉之啼烏轉憶殘春之杜宇歲云暮而蟋蟀
在堂聲原悲於莎雞振羽城闕微雲關河連雨獨秋士
之多哀聞雁聲兮延伫卽如土燮遠征陶侃出鎮標銅
柱兮壯心渡鐵橋兮蓬鬢去任子然功名無分戀闕羨
匈奴之臣辭朝經涿鹿之郡紫禁月華雁門霜信又如
陸賈作記虞翻著書憂樂本異乖離不殊同然漂泊倍
惜居諸監關之霽雪寒甚珠厓之惡浪可虞憐歸去之

獨後枉問訊其何如亦有作客帆檣依人琴劍冷裝如
落葉之浮重幕笑蓮花之豔盧思道之賦筆罕儔石倉
舒之詩才可念雲集霧散兮余卻同水宿風餐兮誰不
厭社燕衙齋午雞村店以至燕趙棄婦吳越名倡織回
環之錦段裁決絕之詩章慣傳離恨豈學啼粧千里萬
里三行兩行舊院之愁如舊長門之恨並長莫不支枕
怕聽倚闌卻憶便寄書其能達遽滅燭以奚匿徹耳頻
驚仰首誰逼是蓋同慣閱乎關山感其倏往來於南北
若乃杜門謝客學圃爲農秧歌牧笛鄰火村春赴聽鸛
之宿約希放鶴之高蹤卜水旱於吠蛤驚搖落於聞蛩

亦復隔浦乍吟登臺遙望豈驚鷓鴣之呼宛聽鷓鴣之
唱獨羈客之淒涼卽故鄉而惆悵懷遠則一水相環憑
高則萬山如障豈稻粱之待謀業賤繪其久曠已矣哉
秋露零兮葉辭柯秋風急兮水增波雁南翔兮何處所
山太行兮水滹沱縱所如今哀嗷嗷戢翼空林兮當奈
何金臺遠兮渺難卽隨北歸兮故人多

重刻廣州鄉賢傳序

道光庚寅余修邑乘得讀潘君廣州鄉賢傳若干卷蘭
茝千春梅檀一瓣傳惟耆舊錄比聖賢心竊儀焉而惜
其流佈之未廣也咸豐辛酉戎氛漸熄營葺郡庠懷舊
思古脩廢舉墜園似布金而迺就主非礪石而靡存名
宦業待蒐羅先賢仍勞考隲文獻不足職志闕如重獲
是書不禁狂喜獨是明季諸賢身騎箕尾名重山邱膺
特典於後來宜彙編之尙缺又如熙朝尊宿昭
代耆英彌極矜嚴夙推公當均當補入亟與編成任詒
續貂終妨飽蠹草樵吟社諸君子特任梓費同付琬鐫

俾作後進楷模洵屬後流準的芳華靡絕桑梓必恭悅
其好義心虔爰奮筆以爲之序焉詳檢原書如陳文恭
擢之於卷端張處士附之於篇末頗乖義例似煩商略
謹附闕文之義卽仍往帙所編祭鄉先生於社早有定
評近孔聖人之居不徒私淑開來繼往第厠儒林文苑
之班毓秀鍾靈同應紫水黃雲之瑞樓誰望氣獨誇南
海衣冠軒邇抗風僅紹南園辭翰地詎易生名世啟我
後人天惟未喪斯文識其大者元精耿耿遺緒茫茫名
教攸關祇繫一鄉之宿望音徽未沫爛然五嶺之幽光

輪臺紀略序

輪臺實唐虞之三危獨西北之一垓裴岑之功詳紀碑
在燉煌耿恭之志冥通泉湧疏勒蘇總管進至曳咥賀
魯成擒王方翼第刺庭州伊麗轉戰業開郡縣仍等要
荒我

朝聲教度越尋恆迨再闢新疆屹然重鎮俾規模乎六
部戎府威靈資控馭乎八城

神京保障赤狄青羗之漸革風車火徼之俱來趙宋之
棄十六州固稱孱國李唐之原十六衛便詡巖疆且也
望衡對宇越陌度阡雞犬田園牛羊閭巷攝桑射雉飯

稻羹魚沙裏鹽甘雪中煤煖蔬足果足桃紅杏紅青瑣
赤墀舞衫歌扇釋氍毹裘而服統綺易弓劍而業詩書已
迥異於極邊實不殊於中土然而風饕雪虐水遠山長
車殆馬煩毫楮遂廢報煩鸚鵡書萬里而應疎芥誚駱
駝賦六合而無謂李將軍藍田偶獵仍煩對簿班定遠
玉門先出遂已棄筆春林先生曠代之才匡時之略人
如劇孟弟畜灌夫希古有心封侯無夢力全搏兔技擅
雕龍偶緣事而戍邊卽著書而問世成輪臺雜記若干
卷備載山川險要軍國彝章緣道亭郵各城廨署穀粟
驢騾之利禽魚草木之生賓旅往還回民習俗證以殘

編落簡詞之退卒老兵話今古之興亡論華戎之戰守
雪鈔露纂殫見洽聞洵可與洪稚存之塞外紀聞天山
客話伊犁日記祁鶴皋之西域釋地西陲要略徐星伯
之伊犁事略西域水道記等書並傳剖別異同參互考
訂亦不朽之盛業殆無負於此行已

德孚遐邇定逾松漠紀聞俗判貞淫或媿溪蠻鼓笑傳
編游俠爭爲北道主人頌織太平特異西州程記

勸善集要序

夫因果論涉緇黃通儒原不屑道而報應捷如桴鼓至理實有可憑又况惠迪之吉見於禹謨積善餘慶本於周易名言奧義疊矩重規三教同源理無二致同里倫君等嘗緝太上感應篇等書若干種署曰勸善集要屬諸鉅公真書而彙刻焉特索序言試爲轉語蓋元宰必讀之書仍司空慣見之事僅爲棘闥而勸戒原皆鄴架所弄藏書換山陰之鵞貽付羽陵之蠹祈廣印以流佈宜實心而奉行棒徒喝於當頭針連下而見血必成丹而擲米同咒鉢而生蓮皆座右之箴銘乃塔尖之功德

方能却老宛聞龍樹之鐘符豈詒癡此卽兔園之冊

僕

偶憇緣天能趨丹地愧門逕之各異喜津梁之不疲思
舐藥以成仙願借花而獻佛能拔王郎抑塞無勞擊劍
酣歌須知行者尋常日祇打鐘掃地豔說文章報國
宛然千佛名經定須福命前生勝讀七科元墨解憑老
嫗原同白傅之詩註有經師曾繙紅豆所撰

國朝惠棟定字有

太上感應篇註詞亦極典雅

丁甯致囑勿云菩薩低眉辛苦誰甜莫

怪豐干饒舌

附錄豫庵筆談一則

先君子奉政公好飲酒愛客重然諾親串中有負其

數萬金者不問也中年後始得子撫余兄弟共九人
嘗謂昔人云有心爲善非善而爲善不望報夫有心
爲善未始非善而天之報施亦恒降福於望報者殆
爲中人以下說法具見苦心嘗舉魏文貞十思疏居
安思危戒奢以儉二語以勵子姪暮年手不釋卷日
閱通鑑言厯代興亡治亂娓娓不倦

邵子詩鈔序

邵子詩理趣不凡胸次誰及比乾坤龍馬之象察上下
鳶魚之機曾點春風蒙莊秋水似取逕於香山居士實
導源於彭澤先生朱紫陽夙所賞音陳白沙殆其嗣響
以視釘較打油之作囹兒帽子之詩迴不侔矣茲草樵
吟社諸君釀金重刊鈔本特索序言亦絲繡平原之忱
殆金鑄子昂之論原非偏嗜具有正聲第以人傳本無
我在性情所近無勞苦學妃豨讐校亦精不致沿訛帝
虎原當寶貴宜更流聞已波瀾莫二何礙新建苴茅之
封風月翛然定參濂溪愛蓮之說酌寒泉而薦秋菊儘

得風流擁如花而歌落梅

吾粵香山黃某詩見明詩綜

頗嫌唐突

史春林先生味根山房詩鈔序

自昔諸如季布誰擅詩名政嫺劉昆鮮嫺文筆若乃冰
柱雪車之作瘦僮羸馬之行助有江山恐笑比鄰之似
吟工邊塞定愁知己之難風災火難之區沙度繩行之
地均經閱歷彌見性情懷古既若陶潛補亡復如束皙
傳獨編乎孝友材實冠乎古今萬里逐臣敢說回天之
力九旬壽母竟償愛日之忱風賦春陵之行愛均元結
仍著嵎川之詠品愈王維若我春林史先生味根山房
詩鈔者洵一代之偉人殆千秋之絕作矣哲嗣穆堂中
允昆仲等擬付雕鐫囑襄校勘瑩品難託於仲偉才風

慙於士安謹畧掇其生平庶特存其梗概焉惟先生生
同名世讀夙等身偶業簿書羣推任俠罄萬金而結客
具五鼎以娛親猶然負米之心小試栽花之手之官江
右作令餘干武城弦歌澹臺偶至灌壇風雨尙父依然
祥瑞等於棲鸞忠誠類於咒虎口碑猶在心版同銘朱
邑奉嘗陸雲圖像乃緣罍誤遣戍伊犁黑水飛灰赭山
餘骸城推惠遠縣盡綏來流沙可居瀚海無極戈壁之
險雪山之寒或市月而逢人惟集霰而倒馬祝煩房暑
穴有怪風拜任耿恭塞惟窮水關榆邊柳歸故里而無
期雪窖冰牀夢重幃而不見賈長沙擬宣室之對李供

奉比夜郎之流人何以堪誰能遣此而乃陽關西出逢
盡故人霸陵夜歸獵偕醉尉以將軍之掛客爲戎府之
諍臣漸離知壯士之不還趙熹殆英雄之所保氣豪湖
海下懸榻於耆賢學比河汾卜及門之將相人猶白帽
客比黃衫已而詔許賜環篋攜輶稿荷絲綸於九
禁遞聽循聲歸琴鶴於三城實緣孝感期范巨卿之葬
誼定深交贈蘇屬國之詩才越降將且也憫羈孤之流
落願提挈以旋歸哀鴻逐隊而竟還呦鹿呼羣而乃食
崎嶇重阜怵惕長衢蜂抱香歸鶴餘糧在桐均半死檜
幸再生丁令威歸各如仙羊角哀聞當竊愧玉門生人

愛旅燕之依人錦石重來學啼鳥而哺母金章紫綬歸
然綽楔旌閭藤杖版輿恪侍宣文講幄烟蓑雨笠長
者之車歟門慈竹孝梅郎君之谷如畫十年廬墓畢世
村居其胸次殆加人一等宜其詩理趣不凡條然意遠
風神散朗格律謹嚴宜抗手於高岑屑傾心於皮陸異
西崑之塗澤無北地之叫囂唐子西謂杜陵爲此君虞
伯生比漢廷之老吏意存伊洛氣挾幽并識卽健兒解
煩老嫗卽論昭代實袁蔣王趙之繼聲偶作寓公亦
屈鄺陳梁之嗣響亭曝書而無泯維桑當祖竹垞堂載
酒而倘存鱗香殆屬坡老泓崢蕭瑟潔淨精微與秋色

而爭高書歲華而可讀昔者黃河遠上雙鬟唱徹新詞
暮年白社閑居十手鈔存近稿豈第如梅宛陵之句偶
織弓衣李君虞之詩爭畫屏障也哉寸草吟悲東野添
綫幸報春暉卷菴集亞北江荷戈還占喜雨光芒萬丈
獨欽寶劍之篇福命三生殆軼秋筵之作

秋筵集 國朝吳兆騫撰

熊笛江廣文遺詩序

稱詩吾粵人祖曲江至前明而海目標能瑤石擅美十
先生騰聲於勝國三大家嗣響於我朝近數馮黎復

推李

繡宋
子灣

其他高言妙句縟旨繁文不乏替人居然

作者然而源須導夫積石沙任散於恆河宜雜仙心勿
墮鬼趣陶亮閒情張衡絕唱迭主敦槃而無間足張旗
鼓而翕然者其爲我遂江廣文乎惟君前生宿讀曠代
逸才其人殆狂狷之間並時無伯仲之輩思光賦海小
杜談兵龍性難馴鶴聲誰盜腹止半豹目無全牛信萬
馬之皆瘖嘆一夔其已足太原公子知虬鬚而特來江

東孫郎謂猗兒而共避合 熙朝而論直抗手於王施
卽近代而言豈傾心於袁趙黃景仁洪亮吉且遜其沈
鬱蒼涼也錢牧齋吳梅村不如其清轉豪宕也星斗羅
胸雲烟過眼飄同墮葉落比閒花滄海橫流名山何企
篇惟寶劍貯乏錦囊等敝帚而誰珍云尺璧其非寶恨
人如僕江醴陵之餘錦不完太傅爲誰謝安石之碎金
庸揀孟嘗欲泣復聽雍門之琴壯士一去微聞燕市之
筑良可惜已惟君丹竈自營鍊橋可度短衣射虎長劍
刺蛟擲米紛披拈花了悟阮文達師闢山堂課士工詩
者首推君與徐鐵孫觀察泛月牛渚似鎮西之品題賞

雪龍門荷文僖之廚傳輞川和作裴秀才不減右丞卜
居成都杜拾遺未依僕射夙稱三絕祇借半閒野火春
風行卷舊留聲價檐花細雨冷官深負平生曾棄產以
營書特辭官而賣畫時也波恬塵靜歲稔人和君與謝
里甫先生潘伯臨比部錦袍人物玉塵元風銀管同操
牙絃迭奏斜簪散幘白舫青簾擬北郭之聯吟記西園
之雅集仿裕之之野史艷陶家之水仙復有綺裳連襪
歡竹吟花醉墨橫飛洞簫誰謚余亦間與琴尊跌宕笠
屐迎延紅豆倚聲金荃撰集夢西湖之煙月詩家長存
翁事謂錢翁事話北地之輪蹄酒徒未散匪逃禪而堂登大雅寺

歷周秦同鑒古則樓醉總宜船盡書畫住萬松園而命
酒紅蠟成堆弔百花墳而訪碑紫駟屢駐尉佗宮殿鮑
靚房櫳華林試達摩之泉海幢復議郎之廟珠濬月色
猗海濤聲譜荔支香而渡江夷光一舸編藤菜碧以乘
屋迦葉半帆花埭冶游筆牀茶竈訶林淨社金戟玉鉉
王子晉之後身吹笙亭在陸大中之行紀拾翠洲回洵
足樂也月苦風酸海枯石爛似晨星而竟盡覺今雨之
都非逝水彌年停雲在望屢扣西州之策仍求北海之
文斷楮零縑殘膏賸馥嗟嗟君仍藉此以傳哉蓋君中
年後屢言寸心得失撰著綦難一藝專精流聞較易仿

漢魏六朝各家傳作根柢宜先綜唐宋兩代鉅手英篇
波瀾莫二務觀伯生而下自檜無譏公安竟陵已往於
今爲烈扶輪當屬之吾輩橫梁端推乎後賢遂乃殫心
顏柳馳譽關荆歲恆千金日止一石何須舞劍乃助興
而作圖原可易錢輒欣然而題扇人環墨客揮犀特豪
經儷黃庭換鶯誰屑取原以義得本非諛鐵門之限爭
踰草堂之貲竟辨嘗謂余曰問來自寫青山賣不使人
間作業錢唐伯虎句余答曰湖上水田人不要誰來買我畫
中山唐伯虎句亦正未可知耳而君乃爽然若失也曾幾何
時四郊多壘九服皆兵圖第仿乎桃源語更癡於竹屋

而君亦以哀物悼世旋歸道山矣同時倡酬諸子又若
倪秋槎大令陳仲卿吳石華兩學博顏君猷儀墨農兩
孝廉黃石溪明經徐夢秋鄧心蓮鄭棉舟三茂才等以
君方之人爭說項我獨推袁已沈休文曰若夫敷衽論
心商摧前藻工拙之數如有可言也謂夙構爲無足重
輕視新作仍未甚愛惜風流雲散木卒草亡同招三閭
之魂誰鑄閬仙之像遺詩二卷附題畫詩一卷哲嗣湘
湄上舍所輯也蟬缺哀朽補亡蒐逸署曰吉羊溪館詩
鈔擬付欽劄委撰序焉非君意也嗟嗟詣羅含之宅蕙
箭凋殘叩崔護之門桃花零落老成頓盡歎但可知耆

舊誰傳音徽邈矣然而一鱗片甲自炫五采屑玉零金
廼裝七寶阮咸三語祖詠兩聯枯樹一篇韓陵片石依
然獨出冠時也殆長庚降而挺生豈少微隕而求死內
翰位業猶記寶陀刹僧東阿文章定作遮須國主懸劍
聊學吳札著論終遘桓譚何必萬言業同方朔像贊無
愧一字宛作林宗碑文

儀墨農孝廉詞集序

倚聲一道體沿變雅意昉離騷咸知樂府之遺獨備教坊之用實導源於青蓮前輩無待侈陳能衍派於白石老仙庶幾嗣響以蘇辛爲別調不乏替人有朱厲之遺音無慚作者乃多歧路仍各擅場而要之工拙不存乎此也墨農孝廉早譽石麟前生青兕聲名官職聽造物之安排經濟文章合古人而位置詩文特富詞曲兼工瘦定比於黃花祝豔傳夫紅豆中年哀樂久嗟玉樹之埋大著留貽先刻金荃之集璧忝附雲龍非猶風馬譜舊時之月色與古爲新吹乍起之東風千卿何事北海

之尊鼻倘在君苗之筆研當焚述梗概於生平誌心形
之俱服已夫虎賁容貌究異中郎優孟衣冠仍匪孫叔
杜拾遺之膏馥沾丐原多李記室之襤襦搏撻不必孝
廉則熱血一腔寸心千古人知劇孟兄事袁絲英雄之
俠骨棱棱兒女之封題叩叩會都眞率事本尋恆有客
黃衫隔江紅袖伯鸞穿豕思近要離光祿當筵閒呼騶
卒焚張壯武之綺語思鬱風雲懺陶靖節之閑情賦抑
流宕曲盡陽春白雪意仍香草美人此其宜工者一也
書破萬卷懸知下筆之神字識一丁仍等彎弓之輩羌
無故實未易解嘲儘得風流仍勞勸學孝廉則胸羅四

部手披萬籟金版玉箱劉畧班藝言矜倚馬心喻雕龍
旋擲米以爲珠總釀花而成蜜胸臆第率業爲一國所
推才技畧分甯僅十人足了以三餘董遇比三絕鄭虔
原具三長夙兼三好力偏同於搏象手乃儷乎射雕此
其宜工者又一也枕邊游覽便詡神仙戶限功名終嫌
迷悶縱偶思乎螺蛤端不負乎鶯花妙詞亦譜學費洲
癡語恐嘲同竹屋孝廉則越井驂鸞雲淙讀史燕臺躍
馬輦轂稱詩排雲作泰華之游對雨赴羅浮之約太
行山色采石江聲北固疏鐘西湖畫楫渡迎桃葉涇采
蓮花奏神弦於玉女靈祠抬折戟於周郎廢壘撫時談

劍謁勝朝之壞殿枯陵懷古訪碑弔前代之殘山賸水
志輿圖於嶺海瓊島洪波夢里開於晉秦潼關斜月過
釣瀨則垂綸遺興詎謝皋羽之餘哀登酒樓而潑墨留
題寶董糟邱之所築此其宜工者又一也異幼安而割
席非賈誼而杜園論廣絕交辭反招隱游皆鹿豕侶亦
魚鰕真作野人之居是謂愚公之谷孝廉則東南名士
爭拜下風臺省鉅公緬懷舊雨陸機入洛敢問葫蘆韓
琦帥揚與賞芍藥復有朝廷人物風雅總持慶厯詞
章文昌下降亦共呼爲才子許以台司揮玉塵以談詩
擲金龜而命酒沈隱侯之名筆見獨王筠丁敬禮之小

文定於曹植唱鬱輪袍而誼屑讀寶劍篇而夙知鑑卽
千秋師惟一字笑郝隆第作蠻語恨張融不見吾狂耳
所以摩詰盛名有裴秀才之和作退之聯句與孟東野
而齊稱擊劍誰精妙畫宛然神助刺船輒返彈琴頓覺
情移爾此其宜工者又一也哲嗣思山義琴昆仲能讀
父書委撰此序深慚元晏之筆宛報秣陵之書非聞笛
而泣然聊舉盃以相屬禮黃梅而參妙諦詎聞法秀之
訶時余寓長壽寺書局歲丙申
丁酉屢與孝廉讌集寺中賦紅杏而擅才名乃遜
尙書之福瓊樓玉宇素抱可知鐵板銅琶雄姿如見卽
屏風而圖畫合比李君虞之詩有井水而能歌豈讓柳

屯田之作

儀墨農孝廉詩集序

咸豐庚申夏四月儀墨農孝廉哲嗣思山義琴昆仲刊孝廉詞集成囑爲之序冬十一月復刊其詩以余知孝廉最深仍囑序焉辭不獲已受而讀之而不能無言也當其麟角剛成猓兒共避雪滿門而獨卧雷劈柱而不聞超比阿龍讀甯半豹總髻卽持清議鄉校之禮祀本嚴橐饘深費苦心詔獄之平反共賴小住蒲澗輒願名山之藏未營草堂頻歌廣廈之庇爰脩職志恆借筮以訪碑夙喜交游慣題襟而說劍阮文達師開學海堂課士和方孚若漫尉百詠竟日輒成如杜正元上林諸作

及時並了賞沈璞之速藻笑朱异之不廉本有大名猶
然餘技月明牛渚定由鄰舫以聽詩風利馬當宛侍華
筵而撰序來往都門聲華藉甚讌游幕府書記專司捫
蝨可談聞雞獨舞機宜洞悉匡贊實多許青士光祿楊
桂山方伯黃霽青太守均擊賞焉高同徐穉下懸榻於
陳蕃識比呂虔贈佩刀於王覽偶依嚴武獨爲工吟卽
和馬援罕聞吹笛留侯請箸希範裁牋藉解連環待貽
撲滿壬辰省闈程春海侍郎典試粵東裒然獲雋句有
春風野火猥蒙特地搜尋言皆古誼忠肝共以得人慶
賀重司空圖之才望先輩特稱謂蘇長公之文章老夫

當讓長鯨跋浪駿馬嘶風著論夙許孫洙直倫賈誼登
科乃如李邵轉愧劉蕡不可企已祁恭恪師撫粵尤倚
重焉人非宣武賓似郗超望比萊公才越魏野匪常何
而草奏特倩馬周如王商之罷朝輒詣樓護將軍揖客
丞相可人有推心置腹之誠宜披肝瀝膽以報脩然鈴
閣預讌名花創建社倉未儲義穀而孝廉竟歸道山矣
嗟乎孝廉豈僅欲以詩名者耶厥後海隅多難嶺外騷
然劇孟之來隱若敵國曹休相委殆匪參軍讀杜司勳
之罪言論兵嚴密撰崔與之之全錄闔境澄清軍戎度
支豈異人任而顧湓然長逝也良可惜已猶憶西園翰

墨北海尊壘繪成雅集之圖結仿聯吟之社大雅堂荒
園十畝妙高臺古水一泓豔說千秋閑緣半日齋同醉
雨畦盡菊花亭共聽潮屋有藤菜句先呈佛意總懷人
會幾何時珠傷月死廿年聚首覺今雨之都非卅輩盟
心似晨星而竟盡知交淪落掩卷惘然已其詩也飛騰
綺麗蕭瑟泓崢導源於靈均嗣響於太白遠宗陶謝兼
祖杜韓揚宋明之清芬擷中晚之餘豔本異春蘭秋菊
爛然瑤草琪花射九虎之精能策六鼃之雄略長鎗大
戟古器精金合元帥之交稱非老嫗所能解寸心默運
生面旋開如鶴唳猿吟如鵬爭鯨吼異十先生之清微

淡遠詎囿鄉風同三大家之古直悲涼不關時局曾以
老吏相目豈有偏師可攻河嶽精靈星辰位業獨賞佳
羅浮時一集山水緣深竊推游 輦轂下諸詩幽并氣
壯合近賢而評論袁蔣均非卽吾粵所推崇馮黎誰屑
所謂前無古人後無來者孝廉之自命殆不凡矣素抱
未償壯懷空熱年年嘆逝之賦各各憂生之嗟誰教地
老天荒幾至草亡木卒楹書善讀叢稿倖完河山不殊
風雨如晦酒壚同過都成泉下故人 謂箇江廣文 樂府並傳
爭詡嶺南作者研經註史尙欲爲紅豆替人 孝廉嘗自言欲究惠
氏之學 善畫能書未肯讓青藤前輩

胡稻香遺集序

道光庚寅纂修邑乘共事者謝里甫鄧鑒堂兩先生梁雲門教授會勉士熊笛江兩廣文張問鴻孝廉胡稻香茂才暨余時余年最少故癸巳撤局讌集酒酣雲門教授笑謂余曰他日重脩惟君能與耳是以咸豐辛酉余題教授遺集有職志刊成過廿年重脩語識諒無緣之句會幾何時春鷗秋蟀落鳳傷麟良可慨已同治丙寅續脩邑乘余獲與焉竟符鴻廡之言彌切羽陵之痛斯文未喪來者難誣眷念昔年同局諸賢並登鬼錄而胡君叢稿更遭投壩之慘宛同覆醬之哀亦可以悽愴傷

心者矣嗟嗟老成凋謝朋舊淪亡玉樹永埋金荃誰盜

生平已矣靈光闇然過黃公之墟酒悲棖觸

謂石溪明經

詣

侯羸之宅文話不存

謂君謨孝廉阮文達師相嘗囑與君同撰四書文話

月苦風

酸天荒地老銜哀茹歎銷落湮沈耳潘聘之茂才胡君

門下士也補亡蒐逸雪纂露鈔得遺稿若干首編作四

卷署曰尺木齋文集亟付手民回首前塵似晨星之頓

盡愴懷今雨如孤月之重圓文獻足徵音微未沫吉光

片羽陳寶赤刀七錄當收九原誰作經義殆原於安定

辨香同藝於南豐洵劉御史

軾

之替人詎姚姬傳之別

孤如歸震川方望溪之評史汲古功深

王少鶴通政刊歸方兩先生評

點史記合筆

繼屈華夫溫謙山而選文同時論定

陳雪漁學

博輯嶺南文鈔錄君

絃輟伯氏永期麟角集傳劍挂延

陵復撰魚苗經序

君嘗撰魚苗經屬作序未就

沈伯眉遺集序

憶道光癸卯春詞林花田共結詞社始晤伯眉沈君交
豈忘年才原名世寄愁與月刻意傷春鎮日嘔心仍愛
錦囊之貯畢生低首甯徒寶劍之篇微雲疎雨之章聯
吟激賞野火春風之什行卷交推耿介壹鬱楚人之意
實傷磊落抑塞王郎之才誰拔郎中三影平子四愁生
平實類鄒陽精采頗同宋玉迨咸豐甲寅冬疊鼓厥聞
高軒忽過似劉琨之傷亂謂鍾期之賞音出祇陀菴集
特命序焉好人譏彈使僕潤飾病同吳質嬾甚嵇康元
晏著論竊愧太沖之賦君苗焚硯緣見士衡之文遷延

因循曾未屬藁遂乃論園陳局開逕款門拜倪高士之
生辰復吳清翁之舊社山堂讀史講院稱詩住嶺海而
憂生詣高涼而錄別以至滄海橫流蕪城共賦家家賃
廡各各移居沈下賢屢夢小專李博士曾逢豪客訪羅
含之廢圃蘭菊叢生謁坡老之遺臺松篁無恙小山桂
樹隨地留人潭水桃花伊誰送汝合稱才子賀季真醉
擲金龜癖譽嬌兒王僧綽能堆蠟鳳謂小兒
懋安管幼安藜
牀可坐白帽翛然杜子美草堂未營春衣日典各賣珠
而易米仍裁帖以乞花間校石與讐方話標燈而環炭
星辰落落今雨涔涔愴絕昔游宛然隔世虎嘯風生珠

傷月死獻歲已延總帳兼旬乃造版門椒花之頌不聞
柏葉之觴誰酌雷霆未作霜雪載零芙蓉之鏡匣無光
苜蓿之盤飧曾飫三生杜牧坐禪榻而溘然三絕鄭虔
辦青氈而竟夭記法華之在手殉堯典以同棺玉樹長
埋金荃有集嗚呼痛哉猶憶端居多暇竟夕聽詩謂愁
苦之易工以悲哀而爲主酷如亡友

謂徐君夢
秋文學

業作古

人絕憐騷屑之音大有蒼涼之感宜焚綺語永保遐齡
詎料狂言竟猶古讖嗟嗟少時常恐難踰知命之年微
疾可痊遽赴脩文之職宿草將列春蘭易萎泉壤既邈
若山河星霜殆修如露電愴懷逝者太息斯人孔少府

之遺著漸湮馬文園之叢稿誰覓風詡後來王粲罕逢

當代桓譚存詩若干卷筱泉司馬特校刊焉原君耐久

交也間沿宋格實具唐音殆衍派於曲紅仍導源於太

白振奇儷乎石鼎

二樵

擷豔等於梅村霜辛露酸風恬月

淡元裕之得幽井之閒氣弁冕中州高季迪還初盛之

舊觀鍼砭北地例以國初諸老殆宋荔裳查初白之

繼聲律以嶺外詞人亦孫西菴黎瑤石之嗣響洵可傳

矣風流頓盡梗槩猶存醴陵之錦段如新謝傳之碎金

無泯祝旂常兮再世託鉛槧以千秋琴宛聽兮雍門笙

倘吹於縵嶺知梁伯鸞之穿冢葬近要離卹任彥升之

遺孤論煩劉峻僅玉杯而問世同錦琴之擅場遺書滿
楹宜續蘭臺之史懸劒空壟宛報秣陵之牋

徐子遠詩集序

我朝經師兼擅詩名者首推顧徵君亭林先生此外固不乏人而仍難數觀若阮文達儀徵師相洵足以比物荃蓀連類龍鸞者矣吾友徐君子遠石麟再世青兕前身獨堂課以標能變宮體而嗣響敘玉臺之新詠秀冠江東艷詞苑之叢談美擅城北間游幕府才軼青藤迭主騷壇名齊昌穀長公豪宕原類鄒陽劍南詩歌不減太白瑩獲交卅年相期千古昌黎聯句能擬孟郊白傅工吟偏推元九嗣以壹志窮經歷觀遍覽鑽堅殫微鉤元提要成通介堂經義若干卷觀王輔嗣之注老子平

叔爽然閱盧子行所撰碑銘劉松未解殆疑其合全力以搏象謂小技若雕蟲何邵公無愧經神詎世儒所企及杜子美夙稱詩史等餘事於尋恆耳乃今讀靈洲山人詩集若干卷而竊嘆其具萬夫之稟通四部之全乃許兼材皆臻絕詣顏氏家訓曰既有寒木亦有春華徐君之謂矣儒林文苑各分一席猶憶烹龍炮鳳提鵬挈鷺褱飲於素馨田上社集於紅棉寺內水明山響

並樓名

栗廩松廬講院山堂漁鱖池館擲金龜而命酒堆紅蠟以徵歌回首昔游宛然心目而倡酬諸子麟亡星落珠傷月死迭愴人琴宛聆鄰笛或媿張巡爲厲以殺賊果

如鮑靚兼室以登仙化鶴不歸驂鸞逸矣授簡半年時
吟侶撫卷多泉下故人秋菊春蘭初鶯早雁朔風零雨
鐵鎖降幡忍俊不禁彌增悽戀興會標舉靈光巋然擬
鍍木而永貽特盥薇而恪誦同祖三唐兼師兩宋騰聲
於魏晉擷艷於齊梁逸比柴桑澀同長吉輕縑素練鐵
板銅琶助有江山辭非月露嘉州常侍遺山道園足抗
手於樊南屑傾心於厯下朱絃疏越玉珮瓊琚但說

熙朝兼踵武於王朱查趙卽論吾粵僅瓣香於屈鄺陳

梁饒有曲江風度誰避簡齋才華

見隨園詩話

洪編脩北江

詩話謂孫觀察李述中年以後專挈六書訓詁之學不

復作詩卽間有一二篇與少作如出兩手以徐君方之

爭鈔叢稿殆比積薪矣刊塞外之紀聞

君嘗刻洪氏未刻書四種

波

瀾莫二媿菰中之隨筆軌轍原同豈必結束鉛華堂仍問字行將霑漑膏馥室儷擘經

譚荔仙大令四照堂稿序

夫楚靈均離騷經在異軌同奔譚大夫變雅辭哀傳音振逸此家荔仙先生四照堂稿所以望古遙集獨出冠時也惟先生楚材挺生家學素裕長吟而代憶梁甫前生殆國主陳芳天問誰知化書曾讀劉孝標之運命自比敬通陸務觀之詩歌神似供奉旣嗜謳歛特愛游覽衡嶽匡廬之勝洞庭彭蠡之奇沿三江越五嶺閱虎門山之廢壘觀獅子洋之怒潮瀕瀨布帆潯梧筍屐志虞衡於桂海象郡薄游傳耆舊於楚庭佗城載返湘水灘水聆唱竹枝之遺音羅山浮山踐夢梅花之宿約本將

軍之揖客實平津之素交思軼李華戰場非古而曾弔
官誰鄭俠流民到今而可圖條侯深喜劇孟之來細柳
營肅武谿似聞爰寄之和扶桑柱標斷井頽垣殤魂鬼
火枯陵壞殿破帽殘衫賦仿登樓賤辭記室具萬夫之
稟談兵夙知非百里之才理縣誰屑從軍奚樂薦士孔
殷需次特遲冷裝仍辦典金貂而買醉揮玉麈以談元
弟畜灌夫人詣樓護年年書劍各各琴尊沈初明有通
天臺之表文鮑參軍惟大雷岸之書札匪移家之范蠡
同賃廡之伯鸞逸興遄飛壯心未已或代人屬稿或對
客揮毫籠有碧紗賚無金爵錦囊攜至玉版鈔完並付

雕鐫業廣流佈李君虞之作好事恆盡於素屏柳文暢
之詩鉅公屢書之團扇旗亭迭按以簫譜蠻峒或織於
弓衣也僕忝同譜牒才贊弦韋豈司空圖而品詩異宇

文迥而餉序盟薇吟誦擊節嘆賞竊謂紀昌射蝨痾僕
承蜩無以埒其微至也佞飛斬蛟應真伏虎無以儷其
精能也烏獲扛鼎宜僚弄丸中散琴希野王笛咽是蓋
由周雅楚辭以迄漢魏六朝三唐兩宋遞至前明諸耆
宿熙朝各宗匠兼收並蓄汎覽流觀如鑪冶百鍊之
金如釜飪八珍之饌莫不傾其瀝液擷彼菁英顧乃自
言專學老杜惟老杜一飯不忘致君有術八哀絕作思

舊惟賢用幽意日到羲皇許此身時比稷契陳濤斜之
竟敗青坂餘哀武侯廟之永存錦官肅拜彩筆曾于氣
象芒屨願荅昇平在諸將之忠良復兩朝之開濟惟先
生真性格天雄才蓋代心同憂國略豫匡時今日者
運際中興仙侶同舟稚圭抗疏卽趨翔於畫省伏枕香
鑪第讌會於曲江金錢錦瑟慶隨恩澤便掌絲綸且
將併九節度之師豈徒獻三大禮之賦建洪業於昭
代洵浣花之替人詩特餘事已而不然者福地語傳預
葺仇池之茅屋故人貲惠如築成都之草堂獨臥滄江
猶驚歲晚誰趨幕府詎負平生采藥未遣乎兒童壽梓

長留於天壤亦所深期者耳拙集敢論花萼臭味託同

岑之苔再來端爲荔支曾否啖吾家之果

荔支有名譚世祥者產端

州見家康侯農部聽雲樓集

美人未暮詞客有靈思公子兮敢言秋

蘭爲佩願王孫兮不歸芳草如積金鼓暫停無忘直北之語杼軸獨似盍賡大東之篇

潘鴻軒雙桐圃詩鈔序

禺麓潘氏門才特盛毅堂舍人伯臨比部棣塹庶常星
渚孝廉季彤都轉韻石穀香雨員外黎齋分司駿坡文
學先基足懋儀望俱華而舍人比部觀察文學尤擅詩
名各各工吟人人撰集瑩門推韓穆交訂紀羣嘗緝楚
庭耆舊遺詩並存錄焉鴻軒戊戌才固舍人之姪孫比部
之猶子分司之佳兒而文學之難兄也爾其地卽平泉
人如逸少坊連文杏巷接青楊細帙縹囊玉箱金版秋
花庭院元亮翛然春草池塘阿連晤對亦謂雙丁兩到
唯稱二陸三張而乃句遺紅杏先悼景文詠著碧桃復

猶昭諫李將軍之射虎任公子之釣鼈中散竹林左徒
蘭畹爰葺雙桐園以吟嘯於其中花塢柳塘白舫認王
維之墅藥畦蕉埤黃衫知員俶之莊種誇公輔名家浴
豔隱淪軼事苔花暮雨蘇端明之寥落可知木葉秋雲
柳文暢之聲華彌著固非慶百但記畫圖閣埒蛟門卽
名詩集鈔存若干卷命餉序焉如絳霞之在霄舒卷自
如如素月之照水光明普放嬋三大家之豪宕而稍斂
其辭鋒造十先生之清微而略變其文格樂府擅美鐵
厓西涯各體標能季迪孟載崢泓蕭瑟大雅不羣攻總
任乎偏師解難遇於老嫗求之兩宋殆梅宛陵姜石帚

之繼聲例以三唐亦孟山人儲太祝之嗣響琪花瑤草

早雁初鶯昌穀庶幾松圓誰諡禪心早悟於蓮社宗法

定師乎稼堂獨契司空表聖之言詮品參廿四苦學石

鼎道人之逋峭樵攬西東

尊人集署黎齋而君詩體格實異樵夫原不必泥耳

槩建安掉鞅天寶功存野史譽美謫仙愈唱愈高進胡

可量哲嗣珏卿學早殫乎四部聲復雋於一費集編花

萼而永貽詩比蘭芬而扇發已攬林之江雨欲來興何

可敗爲圃而家風始述居豈容閒千秋鑑比曲紅六館

銘猶太素西崑麗藻實溯浣花嫡傳北海清才永紹崇

賢選學潘閔才調輕綃人織詠潮議郎著撰遺軔宅儷

飛雪琴非焦尾龍門之煙月常新集佇等身獅海之波
瀾靡盡九原可作依然鮑翰一家五管斯文所在光芒
萬丈

李子黼廣文柳堂詩錄序

夫志士肝衡前哲恨匪同時通人纂輯彙編交論異代
况復曾相師友者乎盛衰隆弊契闊死生鉛槧千春羅
袞一致或珍同鳳羽或束比牛腰或方朔萬言或韓陵
片石江湖問世

江湖小集南宋末陳起輯刊

風雨懷人集卽撰於篋

中均推作者書輒陳之座側彌感昔游已若今觀李子
黼廣文所刊柳堂詩錄若干卷而竊嘆其先得我心也
若夫薛劍光埋牙絃響輟芙蓉之城闕安在棠梨之耶
壘全非列宿草而漸涇痛春蘭兮靡絕杜司勳之賸稿
夢咎徵而竟焚趙臺卿之遺言罹重疾而易泯宣室之

問誰對茂陵之求靡因夜臺翳如秋墳唱徹白玉文徵
李賀黃金範鑄子昂此其宜錄者一也若乃星離月阻
水複山長暮雨自歸春波無極勺藥誰贈唐棣爾思異
李都尉之生降永難攜手似休上人而怨別疇不銷魂
聆磬欬於夢中索音徽於畫裏雪來柳往錄別彌年月
上花開相思誰最卽有素心知交卜居而共數晨夕烏
能皓首相對暫隔卽邈若山河已此其宜錄者又一也
詩卷長留於天地姓名特重乎邱山異域流聞古人著
撰才華奪錦品藻籠紗仍俟闡揚奚從抉擇而不知杜
韓集在詎盡英篇顏謝稿存非無累句採元珠於赤水

斲蒼玉於藍田知己半生報之千古耳卽舊習於撝謙
謂匪操乎選政殆緣偏嗜詎曰定評然業許擅乎顯門
卽聲賴傳於虛谷釀花成蜜粒米皆丹已此其宜錄者
又一也骨誰求乎駿馬腹幾飽乎蠹魚搏象願奢屠龍
技拙劉秣陵緒言餘論永念報書庾開府落簡殘編未
聞餉庠帖恆裁而乞米詩共詆乎看花舞如意而能豪
擊唾壺而屢缺塵未揚乎東海沙總散於恆河耳未忘
結習能值幾文偶荷品題如登一第此其宜錄者又一
也且也阿咸三語微之十聯悟比拈花味同揀樹崔信
明之語妙聞見原同李君虞之句傳畫圖各寫春風野

火鐵鎖降幡妙解雙聲齊稱三影梅宛陵之片語合纖
弓衣柳文暢之單辭待書團扇編瑤截貝實本張爲主
客之圖屑玉零金益重殷璠河岳之集此其宜錄者又
一也吾粵溫謙山舍人粵東詩海鄉邦之文獻足徵今
古之耆賢略備凌藥洲茂才 國朝嶺海詩鈔但論

昭代靡問他邦劉樸石太史嶺南羣雅亦崇交誼第操
土風伍紫垣方伯楚庭耆舊遺詩愴懷逝者邇及生前
廣文茲編稍異厥旨止存舊識未遍時髦與致脩然標
榜誰屑今雨蕭瑟晨星依稀遐邇存亡梗概略具都爲
一集隨有續刊 僕 夙喜謳歆業經甄錄驥尾竊附豹皮

幸留品詩合讓乎司空委序實愧於元晏朱檢討曝書
亭築盍綜明詩鄭海雪洗研池同蚤讀嶠雅君如蒲褐
遍傳湖海詞人我亦清翁共結田園吟社

庚申修禊集序

歲當辛丑閏值重三獅海波翻虎門星隕獨檣不靖百
堵皆空艤艫逕抵五羊閭衙分屯萬馬學離家之王粲
比賃廡之梁鴻誰如桑者之閑竟負花田之約

預訂修禊花田

不禊事不舉春光遂闌茲喜庚申再逢元巳人間何世

天下皆春事記廿年俟鴻來而燕去春添三日仍柳媚
而花明如擊鉢以催詩合典裘而貰酒然而鯨鯢偃蹇
痛城郭之寂寥豺虎披猖盼津沽之消息復苦荏苒之
肆擾倘贈芍藥而將離決歲懸軍彌年避寇大江南北
逋亡屢破堅城吾粵東西故老第思飛將敢爲歡而排

日仍刻意以傷春已則有總持風雅妙解文章迭捧敦
槃各張旗鼓烹龍炮鳳挈鷺提鵬典遠溯乎周秦旨各
參乎易老潔新濯故問兵燹之餘生續魄招魂作水天
之間話樓羅麻在轉忘婪尾之期文字飲豪爭作遨頭
之會鶯花局判選客矜嚴櫻筍廚新閱時變換均入竹
林而把臂誰詣蓮社而攢眉惜彈指之光陰壓傷心之
懷抱謝公陶寫漸多哀樂之年裕之生平最有登臨之
興或忙于黃蝶或閒似白鷗度度扶歸各各治具縱無
情而有恨折柳安問廢興見觚勝唯有醉而無名借花特
供排遣耳三月三日柳堂修禊主之者李子黼廣文也

十三日補禊主之者家博泉少尹也居如陶亮鍛豈嵇
康花竹翛然舊是郎君之谷琴書獨擁恒多長者之車
亭濯纓而特宜交總角而耐久三月三日長壽寺修禊
主之者羅六湖廉訪也半帆去住一鉢因緣月待彎環
潮聽鳴咽王阮亭之宏獎耆舊徧交曾直指之風流圖
卷猶在閏三月一日訶林預作閏上巳主之者倪雲衢
少尹睟昌上人也二十三日展閏上巳主之者潘鴻軒
茂才也建德荒園仲翔遺廟幡動殆緣心動塔存依舊
髮存軒訪授經儻識西來之意池留洗硯緬懷南徙之
哀閏三月三日杏林莊修禊主之者鄧蔭泉中翰也藥

爐丹竈經卷繩牀白舫青簾玉釭金戟門無虎守亭有
鶴飛大隱而婦孺知名臥游則谿山如畫閨三月十三
日賞雨樓展閨上巳主之者亦家博泉少尹也談多稼
穡農丈人同話到松楸義田莊好風煙臺榭城市山林
能詩當諡松圓顧曲羣推竹屋莫不奇情迭逸興遄
飛隨地綠陰之堂淹旬玉照之局花牋疊貢筍屐重來
琴蘂畫孟竹洲花嶼筆牀硯匣散幘斜簪曾題落木之
庵夕陽春草日醉飛英之會驟雨新荷業梔子之芬菲
復榴花之照灼遂舞鸚鵡且食蛤蜊戒蟋蟀之太康日
月其逝虞鴟鴞之或侮風雨所漂其人如季札子房此

地豈殘山賸水張翰云人生貴適意耳及時行樂不約
而同良可慨已幽賞未罄清吟紛來凡有所贈各著於
篇詩畫文詞都爲一集纂輯者則子黼廣文博泉少尹
也僕深杯不辭前席閒與桐花客舍陸渭南帳臨川之
行余修禊後
于役高涼楊柳春旗庾開府夢華林之射序工曲水
才曷愧於延之景異新亭感實深於內史恰如小杜禪
榻颺茶煙落花而眷然余未與長壽寺禪飲半月
後開書局乃移寓寺中曾賦
水邊麗人哭細柳新蒲而誰謂豈良時之不再非勝會
之靡常此亦桃源之圖題慙韓愈盍仍蒲澗之集賦憶

劉楨

閏三月三十日學海棠餞春詩序

嗟嗟虞劍指以難回魯戈揮而竟落何必李尤暮歲悲
深力士之翻尙餘陶侃分陰倍甚聖人之惜所以嘆百
年之易過特愛餘春知一刻之難留轉憐晦日又况月
是三三

見黃仲則詩

重檢樓羅之麻人非七七誰開頃刻之

花已閱九旬又添卅日粗知春在牡丹占亨泰而將闌

牡丹榮辱志花亭泰閏三月

宛送人歸勺藥分別離而誰贈學海棠

者相國阮儀徵師督粵時校土地也風雅提倡端在名

山春秋登臨屢值佳日

某

等著書之暇倍感昔游置酒

其間却多新作茲以道光二十一年歲在辛丑閏三月

盡日約同人於此餞春維時梅子雨晴棟花風過雛成
而雙燕遞教蜜熟而羣蜂懶飛荳蔻長成薔薇了却竹
露侵幌松嵐拂衣日光浮雙塔之間烟翠盪三城以外
鷓鴣啼徹紅棉吹北郭之山蝴蝶飛齊碧草長南園之
社無風無雨黃鸝請而特來半郭半郊紫駟嘶而竟駐
則有庾郎年少江淹恨人或白髮稱詩或金貂換酒十
分美滿天判光陰一樣暄妍人增歲月亦堂堂而竟去
仍脈脈以無言怕杜宇之先啼五更夢醒話辛夷之未
落四月開時分外可憐此間誰樂縱謂明年復有田錫
詩人生三萬六千日可似今年亦祇九月相思李咸用
與君復有明年期
送春詩

相思九

箇月未如此月究歸何處海闊天空難住少時花殘
月缺故是良辰美景耐久春移居然祖別饑離奈何天
限被酒不醉拈詩輒成合座傳觀停尊屬和夫吾人行
樂端貴及時何地生才却堪投老念此日之可惜悵前
塵之極賒買任拌夫千金追難恃夫十駕亦常排日相
與爲歡竟至傷春宛然刻意衛洗馬渡江謂對此茫茫
百端交集今昔同之矣榴花驚照眼之明蕉葉覩傷心
之碧到處兼逢慘綠我更何堪偶然賸得嫣紅春還未
去謹邀同作仍懇先書

杏林莊看杏花詩序

粵本無杏莊署杏林因前典已主人蔭泉中翰壽世韓
康嬉春杜牧靈通造化癖嗜謳飲村莊同白鹿之原傭
保盡橐駝之輩端居多暇著手成春務察實而聽聲念
顧名以思義杜鵑爛漫難令頃刻之閒籀龍尋恆未決
平安之報蓄移花之奢願致伐木之深情則有攜向江
南接從薊北馬蹄秋水珍重遠書鴉嘴夕陽經營初試
魚苗漲膩燕子泥融仍恐吳質不眠旋斫月中之桂王
維偶託隨寫雪裏之蕉已園林瑞應花草精神摘豔雙
身貽芬萬里同俟開田時序倘占及第徵祥蘊藉生香

業著書之人老橫斜疎影笑吹笛於天明待招美人之
魂素馨誰儷似聞仙子之降玉蕊新開護似海棠春意
開以猶後醉同豐粟詩意發以無前去住證槁木之禪
心香踰薔薇隆貴預飛英之公譙開近酴醾紅杏在林
幽賞未已僕半生跌宕曾繙種樹之書十載因循屢爽
詠花之約咸豐辛酉小除夕後三日小琴通守朋邀耐
久船喚總宜兼北海之壯懷仿西園之雅集白鷗前導
紫蝶先知人疑水部觀梅客詎子猷看竹酒家何處須
問牧童詞客有靈先榜舊墅則見酥勻似白粉重仍紅
絳雪團枝彤霞綻萼東風芳草王孫之不歸可知流水

桃花漁者之偶來何暮堂究異於綠野居然碎錦坊如

誰同凭於玉樓宛晤蒨裙人醉紅笑一品

蠻花有名一品紅者園林

是處有之

任相倚於名園豔隨四時許同賣乎深巷登歡喜

地仍聞太息之聲問奈何天盡作無遮之會嗟嗟牡丹

勺藥浹歲南來木棉刺桐誰與北徙選花船駛載抹麗

今年年種石堦閑供水仙今度度晉呂仲悌云植橘柚

於元朔蒂華藕於脩陵傷之者至豈偶然哉固當與松

自洛移孝元手植荔矜閩產文簡懷歸軼事並傳詳補

職志已猶憶弭櫂吳門碎琴燕市冰天雪窖梵宇琳宮

逸興遄飛昔游如夢等身之金難買七寶莊嚴著腳之

土全非三生了悟似無煩於賸稿又可負乎佳花矧以
麗曲清辭諷高厯賞聊償綺語僭餉弁言谷董羹宜作
臘之酒能罄樓羅厯盡編年之詩復增敬謝花神而上
帆同付梓人以鋟版白頭騎馬有虞學士之閑緣紅燭
揮犀卽宋尙書之豔福蓮誇百子屑倫蠻島之花檜壽
千齡祝比僧寮之樹

謂大通寺檜寺
與莊鄰故及之

長壽寺半帆作荷花生日詩序

咸豐庚申夏六月二十四陳子奎垣約詞人於長壽寺

半帆作荷花生日焉夫泉明種秫淨社偏同遠公水芝

作花壽辰恰繼歐九

歐陽公六月二十一日

八月羨牡丹之祝說

恐無徵三句記子竹之移邀同此醉相與舉碧筩之盃

餉碧芳之酒偶飯紺宇合住瑤池地仍蓮子之湖人嬾

蓮鬚之閣生煩咒鉢佛圖澄別有因緣祠過露筋王漁

洋略得神韻

半帆爲漁洋舊游地故及之

紅雲明鏡韓吏部之文章

翠蕤金支元裕之之感慨憶卅年之勝會洲讌荔支話

半日之閑綠屋編藤菜

歲丁酉與笛江廣文墨農孝廉作半日閑會時讌集寺中藤菜

屋
賞荷聽雨可如萬柳當年雪藕調冰豈共百花生日
同集者共七人人各賦詩余亦和作并序焉

庚申八月上巳長壽寺半帆修禊序

曾南城直指賞雨茅屋集有長壽寺半帆春禊序焉則
嘉慶二十年乙亥春三月上巳也而阮文達師擘經室
集復有蘭亭秋禊序焉則嘉慶二年丁巳秋八月上巳
也師序有云倦心既往者撫韶景而亦悲撰志詠歸者
臨蕭節而彌適各如是者非偶然矣方今風塵未息海
水羣飛累載囂然殊方多難魚龍寂寞蛇犬分明都尉
之刁斗森嚴臨淮則旌旗變換威重誰如衛霍功名端
軼范韓然而露版到遲側聞

宵旰星軺任重實寄安危吾粵則山樓粉堞隱奏胡笳

水驛戈船交馳兵檄珠湄依舊明月能識中秋玉山亦
有黃花誰作重九縱契易老之旨亦切彭殤之哀典溯
魯都感同逸少耳半帆者清聆鐘梵淨閱巾瓶初地莊
嚴之基諸天功德之水雲霞凝座心並肅然風雨攬林
興何可敗時有達官適來寓此則見樹咽殘蟬園警癡鶴疎竹成
韻崇蘭播芳驚碧梧葉落以報秋覩紅藕花殘以知閨
匪南樓而連榻效北海以攜尊參妙偈於散花證前因
以煨芋孤松偶撫比栗里之隱淪叢桂乍聞學晦堂之
了悟宛泛茱萸之酒避厄宜先誰賡芍藥之詩餞離何
亟嗟嗟金獅子吼從北地氛淨戰場黃蝴蝶飛遍西園

舊結吟社秋涼如水室淨無埃鴻雁初飛音書偏滯於
畿輔鱸魚正美襍被又抵乎高涼袁宏獨自詠詩應真
虛無捧劍目瞑意倦聊復序焉主斯會者家博泉少尹
同集者共八人時咸豐十年庚申秋八月上巳也越七
日中秋序於羚羊峽舟次

七月五日同集柳堂拜黎忠愍公生日詩序

花入曝衣之樓瓜筵預設柳認同車之巷栗里工吟龍
生日而誰知曾偕竹醉蟬報秋而共賞特借花開此咸
豐十一年秋七月五日李子黼學博所以集同人而壽
前明黎忠愍公也夫金孔雀之徵祥黃牡丹之品藻合
著思賢之咏原推冠古之才當此金戈鐵馬中外騷然
錦石珠湄音容宛在英雄殉國任俠談兵敢託異代之
交特溯詩星之降刀弓自動往還疏葉湖莊像設斬新
供養蓮鬚閣主

鄭紀常通守墓
公集中小像

狀元何愧卽文信國之

生平宗伯可哀偕鄭元勳而陟降人歸香界地近葑園

結新吟社而總持弔古戰場而不必說干將而催酒擊
如意而按歌鐵板銅琶原是周郎人物陣雲邊月竟作
睢陽鬼雄墳補百花詩境薦寒泉秋菊堂仍萬柳神絃
譜驟雨新荷同集者若干人人各賦詩余詩未成先序
焉

三月十六拜前明張麗人生日詩序

酹花冢於荒阡白雲刹古訪葭園之舊墅明月橋通駕

鶩之社可尋燕子之樓何在誦黃牡丹之篇什如譜神

弦借粵海棠之園亭仍補禊飲

主人以上已邀同集雙桐園脩禊

同治

改元春三月十六日盧簡侯比部崔崧生司馬於梁小

韓提舉里第集同志以拜前明張麗人生日焉相傳黎

忠愍所居遺址也博白綠珠恰同故里汝南碧玉不稱

去小家杜牧品題薛濤著撰願爲紅拂合比清娛二獻

祠同六如亭圯冢留青艸精魂知夜月春風斜傍素馨

涕淚閱殘山賸水昔同金爵竊傷婪尾之杯誰醉紅裙

早卻纏頭之錦堂仍玉笑如聞鐵撥銅琶洞有香迷久
住雲堦月地渡非桃葉暫將團扇以徘徊閣本蓮鬚仍
侍錦袍而跌宕玉卮下降返列仙班而偶來金縷頻歌
惜少年時而不必湔裙節近載展花朝擁髻人同定祈
松壽懺前生之豔福倚竹忘寒悟絕代之才名散花同
幻銀箏象板甲帳珠簾紅燭烏絲花冠雲帔兼邀宗伯
居鄰蔬葉湖莊暫供麻姑壇亦梅花村舍龍宮一去屆
桃熟而開筵鸞馭千春續蓮香而撰集人各賦詩余當
屬和兼作序焉

李子黼學博歲暮懷人詩序

歲月不居風雨如晦送窮罕乞米之帖援例比探梅之

詩歲華書戶筆年例探梅花范成大新歲書懷語此李子黼學博歲暮懷人詩

所以哀然成集也較送炭而敢笑清寒若鏤冰而同欽

風雅已况復論交四海匪藉賞譽於公卿執業三城咸

羨推崇乎老宿昌谷才雋同枉高軒柳惲辭工特書團

扇未面以古人相儷弱齡爲後進所宗莫愁知己之無

同恨識君之晚加以脂田粉確不乏替人佛屋仙山舊

多吟侶雞林有客慣索白香山之詩吐谷何人亦解溫

鵬舉所撰蘿袞一致賤繪風聞又謝庭則兒女工吟蘇

門獨弟兄有集宜其雅懷並遂逸興遄飛宛覩各各之音容間綴人人之行檢購樓羅之歷兼致吟牋書鬱壘之符復研新墨仿陸清河之奏賦稍俟迎年效賈長江之祭詩或待饑歲所懷共若干人存歿興替師友錄比得七言絕句共若干首意有未盡者益以五言長律各一首共三首仍如禁體之詩矜嚴選客分寄忘形之契珍重編年始可傳已僕醴陵才盡平子愁多吟止八哀

謂阮文達翁文端師相等

病靡七發曩者訪桃花於是岸

寺名在小港舊多桃

花嘉慶己卯偕夢秋茂才等道光辛丑偕文緣學博等各於除夕買舟詣焉

舊雨都非燒竹

筍於半帆

十年前每元旦偕崧生太翁遂江學博詣長壽寺僧寮

晨星亦盡鷓鴣

啼早紅杏在林

咸豐辛酉小除夕偕小谷比部胡蝶名

開先新萍泛沚

謂數十年來人

竹枝歌歇柏葉樽空城

郭不殊樓臺半圯

謂紫垣方伯遠愛樓十年來小屢彈

毫而竟輟頻撫卷而彌慚已定懷宰相迴殊勝國山人

濫及阿蒙預訂今年禊事棉紅舊剎聿新文獻詞壇

同人

購得紅棉寺故址議建詩龕

草碧方畦載泐君臣冢碣

祀吾粵曲江而下各詞人

舊作柳堂春禊序暨君臣冢碑學博詩並及之故云

送勞辛階制府持節黔中序

使當波恬塵靖海晏山彝祭遵不廢雅歌景丹脩然卧
理詩書禮樂謀元帥合將中軍智名勇功拜征南癖耽
左氏至南海業如召虎主瓚爾釐徂東山竊比姬公斧
斯無缺誰嫻手筆具載口碑臥轍攀輿尋恆事耳若乃
鄭公却虜仍議金縢魏絳和戎特賜鐘磬前身忠武喜
韋皋不愧選材江左夷吾見王導何憂時局虎負嵎而
竟去鴻遵渚以同歌久若巨鼇之戴山實憚老羆之當
道人如平仲北門之鎖鑰專司地卽寶陀南裔之衣冠
彌盛効承平而誰知用意補造化而未屑言功第持重

以安邊經年罷戰定風流而作相去日彌思已若我辛
階制府勞公者江漢英靈崧嶽誕降襟期公輔位業神
仙學洞天人材兼文武祥遠踰於麟鳳貴早兆乎貂蟬
舊著威名鬱爲時望粵西敷歷仙佛緣深嶺右拊循華
戎福溥湖自燒香潛聚滋蔓難除稱同白水真人驅止
綠林散卒警急似圍玉壁精神如破貝州局總萬難事
容再誤陳昭公之守廣漢以功曹爲腹心邢伯子之在
中牟實邯鄲之肩髀扼其衝要授以機宜併將臧宮傅
俊之兵孤羸當卹遂平渤海膠東之寇捕獲實多奮怯
完殘披艱掃穢雁子之都輒破鴉兒之軍若飛卒使堅

城獲完餘孽幾盡三年血戰地驚魚齒之平一品頭銜
帝錫雀翎之麗恩私稠疊儀望高華相期赤縣兵銷
誰唱玉關人老鹿轡久駐龍節近移仍拜中丞卽晉開
府李涼國遞遷六鎮陶威公兼督八州玉帳牙旗風船
火艦共冀其文移詛楚書草嚇蠻便斬月支旋攻日本
而不知曲逆佐漢未絕匈奴靈武興唐且藉回鶻博容
孤注絃可更張縱材氣之無雙業時勢之迥異屬國歸
晚曾聞一雁之空飛令公位尊未妨單騎以相見遂乃
比應真之伏虎學劉累之豢龍班超原萬里之才褚裒
備四時之氣意存謹慎道寓懷柔材具足抵萬兵度量

能容百輩羊太傳之出鎮敵悅推誠裴中令之論兵自言忍事謂青州之存活遠勝中書佇蠻峒之廓清業來新建指揮若定詔陳湯斬馘之奇功擒縱能操用馬謖攻心之上計公履赤烏德音不瑕臣本布衣大事可託卒使陣蛇奔穴旅燕辭巢事異尉佗翕然朝漢論煩江統業慶徙戎化此輩爲孝子順孫千帆遠颺莫吾粵若泰山磐石百堵皆興閭閻皆老佛祇園闍闔盡拾遺廣廈伊誰化鶴城郭依然隨地咒龍樓臺湧現昔之殤魂鬼火騰水殘山今則兼巷竟街望衡對宇綠墀青瑣金版玉箱軟繡亭郵清香池閣桃林蕉埤萬戶皆春荔社

花墟三城不夜黃花白飯沿江遠聽漁謳馴雉生犀合
市遞輸蠻貨具見轉圜之妙無煩請箸而籌語曰爲邊
不可以常智觀也公之謂矣磨牙吮血走魅奔魍摘伏
懲姦陸懾水慄若夫仍校藝於橫舍俾述學於山堂改
建節樓重脩瑣院補儀徵之經解復刻叢編撰延祐之
壺銘宛留銅柱則又揆文奮武知著察微無遺憾已同
治改元冬十一月 天子特命持節黔中卽辦夷務蠻
花狔鳥夢有封章檀几素屏富惟圖籍懸知大宏恩信
酋豪帖然悉泯詐虞遐邇壹體殆所優爲已獨是事總
推袁願仍借寇編氓優悒文士謳歆繪浚儀之畫圖勒

廣平之碑版餞離祖別顯德標功緣道花香忍送盧潛
之去彌年穀賤仍期李峴之還琴鶴如仙鐘魚祈佛至
如瑩者行能無算笑語曾陪擬賦燕城復居環堵桐幾
半死老大可知竹本孤生平安誰報猥蒙獎借實荷生
成感遇酬知彌增悽戀所冀平章之雨沛然文昌之星
復照金爵 帝賚命黃霸之重來竹馬僮偕迎郭伋而
恐後蒼生屬望海隅之邑誦彌殷元老壯猷宋代之堂
名預兆竊愧丹青引作難繪英風回思赤白囊馳永消
浩劫振宗風於南國端賴韓蘇紹相業於西京殆師黃
老似韓雍之方略大藤早平俟皋陶之贊襄有苗漸格

交南底定仗馬新息之逸材天下乂安總范希文之責
任出將入相爲一代之宗臣旋乾轉坤易九夏之殊俗

柯雲墟上舍里木山房印存序

秦漢而還斯冰逸矣誰知篆勢古意蕩然咸用印章師承各判其有別裁僞體同問真源宜補傳於印人合藏書於篆室若吾友柯君雲墟者洵無愧已惟君言通百國畫埒三王友締石交同聽舊雨派均吳下甚得師風鐵筆聲騰於一時銅章能嗣乎兩漢燈明花乳均美玉良金紅沫紫泥宛琅書漆簡環生機趣仍主故常如此風神悉棄凡近搏兔迺用其全力刻鵠任嘲其不成射蝨控弦解牛迎刃斲輪誰喻鼓瑟方希近得里木山房印存若干卷垂紳正笏若泰山磐石之安闔角鉤心有

交葉重花之妙金繩鐵索碧樹珊瑚玉敦珠槃圭璋特
達淵然寶光篋絕藝苑且也不矜揚雲之奇字勘定子
才之誤書日月俱懸烟霞並韻是蓋上宗說文兼核隸
辨綜累朝之金石迄昭代之圖經七十五舉之流吾
子行所彙編特載八十一家之古朱象賢之數典難詳
庶一藝之專精判千春之得失嗟嗟豔說姁姁之寶貴
香魂杳然曾弔魯國之英靈碧血猶漬堂仍萬柳題詠
空存謂阮文達師相聞訪六松儲藏久佚謂潘教堂舍人有漢篆樓印譜是書
尙有典型龍勺彝尊赤刀陳寶無踵謬沿訛之惡習豈
標新領異所能企洵可傳也僕同寓隨如之舊里夙欽

敬仲之鑒裁曾惠琬鐫愧乏瓊報才技擅雕龍聲價宛
對碑英名氏藉附驥流聞並鈐序稿派流同異俟考厲
徵君絕句之詩義例謹嚴如檢謝景卿分韻之作心存
復古遠希張有之書誼重同鄉殆軼未央之譜

朱未央
印譜見

南海志
藝文略

越謳序

粵自擁機歌傳鼓櫓謳著素馨竹葉之製插秧采茶所
詠中秋踏月三春浪花或綰髻流響或摸魚遣聲宛得
風人之遺咸推越俗所擅又况河連玉帶洲近琵琶江
花江月珠兒珠女擅子夜之佳名拊么弦而自訴卽彈
多之所撰已漸近於自然屢作桓伊之喚曷觀周瑜之
顧然而豪如羊侃曲製采蓮情似王珣歌翻團扇劉賓
客特賦九章或以俚歌鄙陋李昌谷每就一詩恆爲教
坊求取不有才人罕聆絕唱銘山明府溫李之才姜張
之學賦朝雲暮雨大有微詞悅螭首蛾眉非關好色閒

作冶游特工話迭引曼聲俾成妍弄賦就石城酷如
臧質譜出苧溪羣推沈玩達可人如玉之情傳著手成
春之態將刀斷水亦遜其纏綿擣麝成塵罕如其激楚
合坐皆知李袞諸伎共白王郎悅秦觀作貴人目元稹
爲才子傷春傷別唯有司勳咏月嘲風誰如學士流聞
已遍篇什轉多手錄口授都爲一集而或且謂延露陵
陽第悅鄙人之聽下里巴人難致國中之和委巷之聲
鉅公色厲狎客之署名流齒冷而不知樂府靡傳土風
迭操唐山之製不必叶於睢麟大晟所演或且淪於桑
濮古來詞客例倚新聲寄宓妃娥女之思寫岸柳江梅

之韻本無傷於盛德正賴寫其中年耳

僕

未能識曲敢

附賞音竊嘗臥酒吞花偎紅倚翠悅庭花之翻落驚積
雪之倒飛幾疑夏統所歌不覺流涕方訝成連已去亦
移我情當夫參橫斗轉標燈環炭喝明月以如盤剪落
霞而作袖天原不曉曲是無愁抗喉遏雲激齒逗雨釧
動花飛悵美人之獨處潮平酒醒已蠟淚之成堆此一
時也迨至登叢臺入曲房解明璫跼利屣堅石爛海枯
之誓永天長地久之約假白雪以通辭借迴波而儷曲
鳴琴在御曷此聲之似啼吹氣勝蘭實一時之無偶此
又一時也若乃鴛鴦打散蝴蝶驚飛經南浦以送君下

西洲而別汝樹梨普梨之曲團雪散雪之歌櫻桃委池
芍藥墮砌憐驄馬之一去撫鵾弦而獨悲盈盈別淚茫
茫離緒此又一時也至若秋扇永捐冬缸獨對怨舊盟
之已寒締新歡而誰與理拋殘之錦瑟檢吹折之紅簫
蛛絲密織冰弦玳匣永安銀甲聲聲決絕卓文君有越
禮之悔字字回環蘇若蘭之迴文宛織此又一時也別
有租船詠史載酒看山不無寥落之感久絕鉛華之夢
扇影鬢絲干卿何事曉風殘月未免有情星房霧閣酒
旗歌板洛陽之紅粉誰迴司馬之青衫已濕此又一時
也莫不蕩魄悅魂損心酸骨宛聽韓娥之善欲盡秦青

之技雖云解則好之亦復誰能遣此痛古人之不見嗟
來日之大難酒闌燈施哀感頑豔而謂撫斯卷者能不
冠阮元瑜於坐中數米嘉榮爲前輩也哉誰詞綺語早
付琬鑄石崇妙伎僅同郭訥言佳李奇新曲差免邯鄲
僞託誰誇各擅詩名詣旗亭而共畫方覩盛傳海內有
井水而能歌

附錄豫庵筆談一則

余少年間作冶游忍俊不禁隨有所贈而槩不存稿
如云花覆船脣炮鳳宴人窺簾角試鶯天又云所約
何當遲十載難捐猶恐是三生江湖載酒時相見便

算瑯琊打槳迎又云來遲或送文舟返歸早翻虞王
漏終欲斷腸應燈又施最銷魂是酒初中又云醉後
似聞呼負負畫成端合喚真真又云稍頭荳蔻酬無
價葉底芭蕉捲有心又云不稱小家惟碧玉可能夜
盜似紅綃他人爲余謫之都如夢境綺語未焚殆亦
閒情靡懣爾

粵雅堂叢書序

代

夙聞劉勰之論曰先王聖化布在方策夫子風采溢於格言蓋孔堂汲郡之古固無待於闡揚而玉箱金版之遺亦靡煩於甄錄懸諸日月積比邱山欽逢

治教休明文史足用行披坐檢汎覽流觀豈有燭火可佐三辰叢薄足裨列嶽然而觚裂疣贅瑣碎支離玉雜鉛充庭折軸縱微言之垂絕均要道之所存雖瑕瑜相形而朱紫待別都爲一集端藉叢書溯自古鄧左山人之舊刊以迄鄔鎮鮑處士所近輯陋似列肆閒坊之彙刻備如延閣廣內之鉅編業並輝映後先亦各流

聞今古某久事編摩偶付鉛槧曾匪噉名之具依然漫
與之詩斲輪任笑以升堂拔戟竊冀其成隊亦雕蟲之
小技或附驥以同傳四部森羅寸心得失請言其概有
七難焉舞同瘡鶴轉羨氍毹伏比疥駝猶矜娥媚削任
禿乎千兔載定束乎兩牛豈韓淮陰之將兵多多益善
寶趙平原所愛土碌碌無奇燈務飾乎九華琴必珍乎
百衲益同買菜貧學市瓜如傅縠之筆不休宜覆酒甕
縱陸澄之史立就仍戲書廚業包等身猶然師耳其無
謂者一也瑤池之駿圖及盜驪金谷之筵饌有萍韭而
乃胡盧依樣小草異名似換羽而移宮寶重規而疊矩

孫叔猶在奚須優孟之衣冠西子自佳苦被無鹽之刻
畫行將壓倒元白非徒閭合孫吳業開卷而雷同或成
書之月異訝節度之麾幟變換不殊笑記室之襴襦擗
擠已慣其無謂者又一也書不止金滕大誥詩豈徒清
廟生民異備六官而任缺攷工同尊四聖而逕刪繫傳
鉅鹿鴻門數葉足具史才小園枯樹兩篇便推賦手恐
抱璞而遺玉謂披沙而揀金踵謬沿訛因陋就簡食雞
千蹠乃許善庖見驥一毛終疑泛駕思鳳留羽夫豈別
有肺腸擣麝成塵究非本來面目其無謂者又一也朝
華夕秀斯兼百卉之稱秋菊春蘭各極一時之選近則

談漢學者尊服鄭而薄程朱講唐音者仿高岑而輕楊
陸縱矜絕詣仍匪通裁卽擅專門宛同編嗜珪璋特達
忍拋墮珥編璫黼黻相須何礙零縑斷楮熊魚均欲宜
兼取捨之言丹素殊觀偏主是非之說其無謂者又一
也班馬史判異同本宜蹈襲劉宋書分新舊互見醇疵
不必如滕薛之爭何至若尹邢之避唐詩具在各矜一
字之師晉帖爭傳或詔千金之本憐屐齒所未到遂古
苔封信文心之獨奇簇新花樣偶同掃葉宜比積薪瑟
旣改弦傳非覆局便譏殘客或詆重儻其無謂者又一
也豔稱淮雨孰辨陶陰原是金根殆非白及業已先書

璽素豈容妄下雌黃惟寫本之未工實鈔胥之屢誤又
或遞經翻刻迥異原文盡信書而惘然宜奮筆而直改
乃作騎牆之見宛如築室之謀但兩說之並存竟一辭
而莫贊是則編惟刊誤必並錄乃算完書史或拾遺定
夾註斯稱足本其無謂者又一也古人不作來者難誣
唯篤好乎奇編恆易欺以贗鼎夫向子期之莊註以郭
象所竊而別行師尙父之兵書以朱服之言而不廢譚
峭著撰竟盜於齊邱阮逸託名實發於坡老倘貴遠而
賤近必留僞而去真將類李斯狗枷相如犢鼻令公阜
襖洪厓幞頭固不僅若鍾鎮西之贗書米阿章之假帖

其無謂者又一也粵雅堂者舊輯嶺南遺書粵十三家
集楚庭耆舊遺詩之地而因以署焉者也言念桑梓之
邦恭敬敢後從事棗梨之役推廣宜先歲月不居行能
無算酌叢編之前式俾故帙之永傳仍與玉生廣文同
發舊藏各從轉借參懷撰定殫極邱墳校練有無損併
存佚愧顏少監之討析必暢本源同諸葛相之交游獨
觀大略不拘時代間攷生平奧義名言隨鈔瑣錄昔賢
之賸稿佚女所戲編倏閱四基始成十集亡待補乎三
篋還敢吝乎一瓶苦奢願之難償憐壯心之未已藏山
誰敢壽世可期更殷勤以訪求仍次第以刊佈汲古邈

毛琴川之博幸際 昇平解經魄阮文達之專誰許私
淑瑯嬛可賃定比張華而更癡 清祕難躋夙羨黃香
之早貴難如成容若之好事重刻徐懋園司寇彙編人
擬重刻通志堂經解敢擬馬秋玉之積書待乞全謝山庶常撰序
鮑琦亭集有馬氏
叢書樓書目序

嶺南遺書序

代

竊嘗遍該緇素鳩閱史編補缺裨殘收亡集逸其有埋
縕歲久哀朽蟬斷誰懸市上但祕帳中恆欲手自補治
躬加題帖付之剞劂永彼流聞不亦文苑之鉅觀而藝
林之快事也哉然而力有不逮誰探禹穴之藏情有獨
深先作土風之操慨自文始鐸椒歌先張買陳欽聞左
邱之學楊孚編南裔之書士燮則經翼春秋王範則記
傳交廣儒林從事易注僅錄於梁書平越司馬集名乃
附於隋志曲紅詩在而事鑒先亡侍御文存而年厯久
缺景祐廣樂記曾編於書錄解題太平聖惠方備列於

崇文總目誰藏西室久付羽陵縱偶拾於蕞殘亦靡從
而排次以至胡賓王則錄備興亡李大性則疑先典故
古亞奭曾刪易疏余安道且刊漢書陳用拙之論琴黃
益之之教射隨如舊咏厲樊榭曾紀其書與子遺文季
滄葦倘存其集張孟奇之雜著名乃襲於卓吾區啟圖
之新編目翻同於海雪或無因括訪或冀可推尋或始
末淪殘或籤牒紛舛斯亦吾人所同慨好事之深憂也
某業慚緝柳念切維桑痛炎洲之翠羽半就凋零惜滄
海之明珠空勞拂拭照軫充箱而靡盡徵文考獻於何
年尋墜緒之茫茫溯元精之耿耿豈不足捧敦槃於上

國張旗鼓於中原上下古今雲垂海立於是才非崔亮
志比匡衡誦三篋而綦難備一甌而屢借恆崎嶇而始
得必治護而敢還雪纂露鈔星分綺錯緘滕誰固部帙
轉多遂特輯其遺書都成一集昔左禹錫有學海之編
陶九成有說郛之撰無分畛域悉備蒐羅茲則專取嶺
南未遑他及卽各私其鄉曲諒無愧於古人至若文莊
衍義之補甘泉格物之通並已炳若日星標如嵩華凡
通行之既久卽別錄而無煩又若白山彝憲園公見聞
浩博紛綸紕繆非一但令好寫未獲兼收俟異日之校
讐俾專行而流佈玉生文學搜奇願篤好古心同相與

刈楚芟蕪申熟討析校練損併隨命琬鐫尙冀玉箱金
版之家假以理窟談叢之奧藏誰三本分有十門一鱗
片甲亦作九光截貝編璫真成百寶華嚴却換原誇海
外文章香火緣深重觀益都耆舊誰許趨翔東觀得讀
此生未見之書不徒弁冕南州均推四海盛傳之作

嶺南遺書續編序

代

夫子長記史論次廿年太冲鍊都構思十稔著撰之艱
難可想歲序之綿曖宜然若乃徵文考獻集逸收亡題
帖補治推尋求訪校綴次第損併有無固自不同無庸
舉例然而曾非五厄業大備而難周不僅四期欲速成
而未可自辛卯以迄於今一十有七年矣曾與譚玉生
廣文校刊嶺南遺書第一集焉譬九軻而掘井止一簣
而爲山顧乃赴禮闈者四度寓京邸者六年聚晤綦難
此事輒廢旣而遂初欲賦懷古惓然又值戎幕煩張島
夷不靖枕戈有願曾廣杕杜之詩捧檄無因竟廢蓼莪

之什而廣文亦以感遇子昂作悼亡騎省全家避寇早
同張翰之思吳一第恩人仍效陸機而赴洛光陰逝水
聚散搏沙千古寸心尤重鄉邦前輩兩家多故難誇風
月閒人嗟嗟結習所存斯文未喪况息壤之猶在豈西
山而可扁當夫山長水遠雨晦風瀟何分兩地琴尊實
當中年絲竹或傳鈔於延閣或購賞於名山或如秋水
之未完或似荊州之難借或類編之既採或職志之偶
存或文字舛訛或篇第褫落大加搜寫參訂異同類聚
而求繙緝疏錄常景耽好以必得爲期譙周研精或欣
然獨笑復於其間有粵十三家集之刻焉別集較繁也

有楚庭耆舊遺詩前後集之刻焉近賢同愛也參懷撰
定尋考指歸鳩聚淪殘勝帙充積而第二集第三集第
四集乃告成矣茲以第二集書若干種先付劖劖永俾
流聞前序可作例言續緝無煩覲縷餘亦年時而卒業
敢言嶺海之鉅觀客曰壽均藉乎棗梨亦謂必由斯道
誼獨深於桑梓無乃各私其鄉余應之曰有志未逮業
作常談所願旣同肯留餘憾嶺南原可達之天下天下
仍可溯之古初庶投老以爲期惟祕籍之難觀茲幸珠
船屢獲金版新鐫獨涇縣之叢書倍中州之文表王充
所論誰獨玩於帳中崔實之書人宜置之座側各各當

辦香之藝重重均翰墨之緣書比左圭奚俟後賢之廣
續心如毛晉况逢 昭代之隆平仍序此書庶同左券

重刻粵十三家集序

代

某刊粵十三家集成而自弁其首日溯自歌傳張買詩紀劉珊司徒舊掾隋志久列於亡書曲江名相唐集並存其附錄劉軻文輯邵謁詩刊陳陶錄佚兩卷足抗乎晚唐余靖撰存一篇兼式乎兩宋此外若菊坡望重集經季滄葦之所藏隨如律工詞信朱竹垞之轉借以迄元明之盛能窮嶺海之才清泉小志而未詳粵臺遍徵其尤雅陳雲淙之結社奚止九人惠紅豆之及門羣推八子猶多論著仍各流聞所購僅此也稍知異物讚說楊孚得近佳人詞推黃損馮融之詩誰和鄭愚之集不

全侯安都未必工吟莫宣卿偶然賸稿以至阮溪詩佚
猶誇基緒於區宗迂岡集亡豔說科名於倫氏其他傳
作非乏名家業已度藏恐難更僕檢八遺民之錄實概
宋元讀五先生之詩敢分前後黎穉坡之理語陳琴軒
之樂歌霍韜四言邱濬類稿黃才伯提鷗挈鷺便許昌
黎陳文恭歎竹吟花猶然邵子岑金紀之遺詩屢刻張
園公之存稿偏多亦有名媛能兼孝行夙推蘭雪之吟
緇流却許儒宗曾覽跡刪之集一例丹鉛趣永獨憐香
火緣深所嗜特此也若夫張子壽爲文場元帥後來競
詡偏師古亞夷原福地仙人有鬼却稱先輩清獻未殊

於文獻武溪較愈乎文溪孫典籍實籠罩乎南園歐虞
部足抗衡乎北地才如吾輩敢薄今人詩到國初合
宗諸老明季自滄桑而後南中之風雅彌新轉獲益於
多師屑借才於異地陳獨漉之集業爲巖野繼聲程湟
溱之詩不爲蘇齋減色同悲屈鄺鶴唳猿吟竊數馮黎
鵬爭鯨吼何報之畧存宋格張葑房頗具唐音鉛槧釐
然瓣香成在所缺惟此也卽如數公著或學究天人或
道匡雅俗或猶多稿佚或另有文存或析名理以註經
或觀古今而斷史或救時念切評量經濟之言或閱世
心勞引伸爰物之疏或中年絲竹寄情樂府以狂歌或

千古文章託業選樓而著論或講六書而研小學或談
六藝以擬閑評未經瀏覽仍待搜羅業等編蒲終當壽
梓茲刻原慙盛舉仍具別裁但取專書止收遺集其或
微言大義與詩文並錄悉本原鈔豈無賸粉零金爲考
訂所資竊因叢稿所業同此也夫紀風會於海隅人文
蔚起論詞章於天下公是當存靈光歸然後死之責又
況淵源有自宜則古先桑梓彌恭敢私鄉曲得偶煩乎
妙手知原具乎寸心信來者之難誣痛古人之不作好
浮名之積習苦語沈碑扶大雅之閑情恆思畫像風酸
月苦護持煩神物之靈木卒草亡剝落隕才人之涕爰

卽崎嶇借得輟轉鈔成藏山所貽閱市偶見隨付剞劂
仍勉校讐書成得十三家卽署之曰粵十三家集焉後
有續鐫仍非定限豈顧集名而必泥終期書目之遞增
至謂商摧是非譏彈得失簡則屈華夫之所選詳則溫
舍人之所編馮箕村之殂謝翕然郵寄豈有成書黃積
菴之專精業已重編誰推善本遠則區啟圖王蒲衣之
舊輯體例難知近則劉太史凌茂才之新編現存兼錄
各矜去取曾審異同識曲聽真宜謝不敏宗派非無流
別高明自有鑒裁耳玉生譚君心苦訪求力襄訂正詩
書可味笑老眼之無花文獻無徵喜閑身之健在屢作

茶瓜之會細論文字之緣鄭重經年編摩此集敢託千秋知己雲馬騷車願爲一代傳人露鈔雪纂或者詩星度世同譜神弦縱令劫火漫空遍留藏本倘任降生何地我曹之筆研猶靈敢期羅拜有人作者之衣冠原古

重刊宋王象之輿地紀勝序

代

維咸豐五年秋八月校刊宋王象之輿地紀勝書成而續弁其首曰自禹貢列於夏書職方紀於周禮辨方經野宜溯權輿起例發凡豈容摹仿又况漢代藝文之志隋室經籍之書不乏圖經祇存目錄至若李宏憲元和郡縣遂涉古迹樂子正太平寰宇兼采文人紀載迭詳體例盡變若夫吳郡所產時有干將莫邪漢中宜繪定先木牛流馬織錦交推蘇蕙可並縣圖著書特爲吳潛竟成家傳譏彈有自斷限宜先然或務求簡要專學謹嚴表或仿斜上旁行說但詳四至八到蕢桴土鼓兒童

謬說賞音元酒太羹主客誰真知味法度居然王制形
神定似漢書藏久束閣而不觀閱卽隱几而思睡所以
宋次道范致能之遺書朱竹垞嫌其太簡康對山韓五
泉之名志章典籍詆其不情逕刪藝文陸清獻詎持平
之論但明沿革戴東原亦矯枉之詞夫山川能說風俗
當知土宜田賦之必須國計民生之攸繫貴徵文以考
獻宜博古以通今考核研求固折衷之至當登臨題詠
仍泚泚之靡窮流覽八荒盱衡千古實有裨於掌故獨
兼益乎詞章此王氏之書所以不可廢也謹按象之字
儀父金華人慶元年中鄒應龍榜進士曾知江寧縣百

里弦歌豈辭官以充隱一家詞賦獨鍵戶而著書才似
賈耽學如任昉勤蒐博采勒成此編張衡重揚雄之元
郭象竊向秀之註吉光片羽久落人間陳寶赤刀卒歸
天上錢官詹之求訪期以卅年阮太傅所編摩達之
九禁宋曾鋟板今但影鈔海內殆鮮完書嶺南幸存
副本吳廣文蘭脩之祕籍陳儀部其鉞所珍藏載兼兩
以何嫌饋一甌而特借未經讐校宜別風淮雨之多易
致淪殘况累載兼年以後爰借玉生譚學博悉心釐定
留意補治覓善本而無從思誤書而敢信朱墨互勘靈
光歸然購之井底之函保護幾同心史祕似帳中之帙

酌量特付手民慨自江左偷安史官失職中興倉卒南渡因循元時特詔纂修宋代尤譏牽率柯奇純之論撰誰貴新編厲樊榭之唱酬猶徵襍事是編則彪之青箱朝儀諳練湘東金管人物周詳紀政要則證以見聞錄夢華則訪之耆舊閒談足用今事能知記異子長奚俟褚孝孫之續註非裴氏殆拾陳承祚之遺此其宜刻者一也崇文總目六朝之故帙猶存紀錄纂編兩宋之遺書不載頻經兵燹載閱滄桑誰鈔北堂之書尙餘東觀之論縱能負如雞次終亦蠹於羽陵耳是編則斷楮零縑單詞數語雖條分於各卷尙概見其原書篇缺嘉禾

標名足徵聖瑞詩逸唐棣斷章彌繫人思屑玉零金座
記莊嚴七寶殘膏賸馥谷分錦繡萬花此其宜刻者又
一也惟唐宋之名流兼嫻文筆實乾坤之清氣增重湖
山然而鐘簾屢移鉛槧漸罕人人撰集各各稱詩縱推
星斗羅胸業等雲烟過眼是編則拾碎金於文靖裁餘
錦於醴陵王子安獨秋水兩言溫鵬舉但韓陵片石吳
江楓冷業見信明隴首雲飛足傳柳惲著撰不朽何必
等身之遺名字翳如盡屬嘔心之作此其宜刻者又一
也且自潛研堂之著錄劄子不存文選樓之庋藏跋語
可攷流傳非久缺逸轉多深恐如日本叢編韋述之兩

京新記未得比元豐舊帙王存之九域全書遲任琬鐫
終當羽化學博喜篝燈而讀史樂尊酒而論文亟與泛
覽流觀露鈔雪纂披朝華而靡倦掃落葉而彌繁迄三
載而乃完或千秋之可託獨惜石郎割地永棄燕雲祖
逖渡江未收河洛悅西湖之烟景效東晉之風流中外
一家河山半壁玉斧劃而羈縻易絕金甌缺而補救難
完屢撫卷而悵然恒檢書而太息唯是文章淹雅援据
精詳縱未如酈道元之註水經實迥異高似孫之修剡
錄方輿原具勝覽未許視和甫之齊稱廣記同屬古書
竊謂歐陽忞之稍遜昌黎願借獨海嶠之遺經蕭相倘

收卽咸陽之故籍但記吉金貞石早備
朝廷四部之
儲休言賸水殘山殆過元明一統之志

楚庭耆舊遺詩序

代

維粵詩倡自曲江至我朝力追正始昔人論者詳矣故由開天以迄洪永屈鄺以逮馮黎赫然懸通國之門不僅貯名山之寺業經傳誦無俟闡揚已所可念者風流頓盡結習未忘頭銜欲署詩人身後倘存文集丁敬禮之言達徒知以爲美談陸平原之書成難說更無遺憾班蘭臺誰與伯仲自古相輕李昌谷不乏親知彌年竟絕敢輕萬戶能值幾文輒誇威鳳之毛終飽蠹魚之腹昔者雙鬟迭唱十手曾鈔德林才名業謂古賢之比侍郎文藻何來賈客之求月苦風酸草亡木卒果知神

物仍與護持同是鬼才定增淒緊竊與玉生譚學博言
及未嘗不愴懷逝者慨念斯文也然而古往今來天壤
之生才不少山長水遠江湖之嘆逝可知誼切維桑悲
深宿草耳亦有通儒碩學手筆典裁早付琬鐫吟研嘆
服朝成暮遍爲後進之所宗賸馥殘膏笑他人之未足
廬山宮裏苦學賈闡仙之詩吐谷牀頭業有溫鵬舉之
集嗟嗟文章公器宜窮達而靡遺嶺海人材慶遭逢而
輩出理原合轍藝擅顓門玲瓏其聲波瀾莫二竝當甄
錄俾益流聞者也爰與學博露鈔雪纂好寫畱真或稱
昆弟之交或屬丈人之行或執業所曾事或聞聲輒相

思或望重紀羣或姻聯秦晉碑殘補缺刈楚芟蕪或與
古維新或當今無輩或精思能至或偏嗜所存得前後
集各若干卷署曰楚庭耆舊遺詩末附東坪先伯霖川
先從兄著撰焉亦元遺山中州集小長蘆叟明詩綜例
也譏遺佚以奚辭待蒐羅其敢緩壽之剗劂慰彼英靈
尤可慨者家青田大令與聞此事業作古人地下修文
倘論契濶人間撰集又益姓名循覽篇章彌增愴恨又
簡永庵孝廉正抱人琴之痛倍深鄰笛之悲同屬故人
囑爲將伯乃安石之碎金未覩而醴陵之餘錦先貽薤
露易歌藤陰誰醉能不悲哉素車白馬未踐前言斗酒

隻雞宛然舊約則此集之刻又烏能已昔王阮亭尙書
感舊集曾賓谷直指朋舊遺詩來特感乎今雨樂非操
乎土風又直指江西詩徵阮儀徵相國淮海英靈集則
遍徵文獻於鄉邦不復分人物於今古至畢秋帆尙書
吳會英才集又僅論所見半屬生前今者勒成一書稍
異厥指誰附選文之僭猶然挂劍之哀業此半生冀公
千古此冊敢期其不朽能言肯聽其無徵漫疑獨私乎
嶺南更合所知於海內平生畧見第仿張爲主客之圖
勲業何如此亦王粲英雄之記

楚庭耆舊遺詩續編序

代

夫羲輪娥魄曾無晷刻之停燕睇鴻來但有煥涼之序
人非金石如橘叟而倖存世盡滄桑定麻姑而始見獨
許文章千古睠懷嶺海諸賢不乏碎金迭嗟埋玉雖驚
波動竹知靈爽之如何而秋菊春蘭慨英華之靡絕此
僕與玉生廣文所以有續楚庭耆舊遺詩之輯也昔同
撰集原待補亡選文敢紹乎維摩立傳畧追夫陸允嘆
老成之代謝猶有典型知遺佚之孔多忍教淪沒而且
賦鵬屢聞驂鸞誰信去歲已傷劉子今茲復悼王生昔
人所悲信非虛語謠徵靈鬼曾歌白馬之牽游有故人

誰夢素騾之去值良辰美景果瞻微闇之獻酬執老子
法華尙說生平之風調樞中著塵慟絕王長史之亡牀
上撫琴難期顧彥先之賞哭房公之櫬江漢同流過斛
斯之莊園林非昔嗟嗟此數子者或騎箕尾或感風雷
或聞甲馬之聲或兆白雞之讖或天上作記或地下脩
文或殉堯典一篇或置孝經一卷或斜衾不事或荷鍤
相隨或同朱仲卿之去思或似楊王孫之薄葬倏如露
電邈若山河庾蘭成有思舊之銘陸平原有嘆逝之賦
任敬子少時誰恐知命則同趙臺卿重疾難瘳遺言易
泯敢謂鍾期旣死牙生輟弦迴殊惠施已亡莊子寢說

恨人生其至此冀詩卷之長留已於是或業付琬鐫或
方虞歿朽或收從良友或索自後人或斷楮零縑或盈
帙滿笥或應接不暇或去留各難義例已見於前書編
纂無勞於復贅或虛殷書言後事並寄新詩或杜牧夢
遇咎徵欲焚贖稿桓譚新論何須班固之續成向秀舊
註尙虞郭象之竊取蘇端明之遘疾死屢出於誤傳臧
文仲之立言歿均期其不朽自癸卯以迄於今復得若
干集而付梓焉嗚呼宿草非春拱木未古中年哀樂蓋
代才名悵舊雨兮不來似晨星而亦殞西州策扣能教
文靖之復生北海尊開奚取中郎之酷似猶幸法言卒

讀原揚子之並時中論常觀卽偉長之猶在披一品之
集如謁贊皇誦千首之詩益懷李白攜酒未嘗言別愧
匪盧郎刻碑待暑醉吟均同太傅九原可作依然角逐
之雲龍四海盛傳翻幸姓名之附驥此後詞章宿老年
齡猶雲濶飛仙我曹鉛槧生涯酬唱仿月泉吟社

鄭小谷鴻爪續集序

代

維道光二十一年象州鄭君小谷比部自武昌返粵稅
駕五羊出所撰鴻爪集初續再續三續各一卷示余謂
司馬之倦游屢賦仲長之樂志難憑結習所存流聞敢
冀資無三逕何妨元亮之歸響到眾山且學少文之卧
笑負書其已誤宜享帚以自珍余受以讀之而不能無
言也夫詩至於今夥矣盛矣人誇速藻家擅英篇才操
不羣風流自賞朝成暮遍曾非好事所傳廣座稠人輒
詡有來斯應裴鴻臚之文在豈必相師沈敬子之集工
居然作賊驅染搖襞玲瓏其聲亦有文場老宿騷壇主

盟富豔難蹤汪洋特恣夔牙孔翠顧有餘慙美玉良金
無施不可李德林之貴顯文章業謂古人劉禹錫之祕
藏護持果須靈物太宗屏上寫楊徽之之十聯吐谷牀
頭有溫鵬舉之一卷曾幾何時草亡木卒仍虞覆瓿殆
甚補袍讀盡魏侯聽而恐臥名非羊傳見亦不知原難
紀實於生平第輒求工於字句已昔高令公爲詩人謂
其有混欣戚遺得喪之致旨哉言乎蓋詩之傳以其人
非以其詩也夫韋柳並舉而柳劣於韋矣元白齊稱而
元輕於白矣性情如子美始獨成蜀中之詩風節若端
明差能爲海外之作今比部早掇巍科翕然時望蜚聲

廊閣寄興林皋其節概已加人一等宜其詩興高致遠
緒密思精雋上清剛崢泓蕭瑟豈老嫗所能解任諸伶
之迭歌不名一家並擅各體求之近代當在阮亭初白
之間例以昔賢饒有摩詰浩然之趣仍署曰鴻爪均紀
昔遊也吳頭楚尾子爾孤征老帶莊襟翛然獨遠翠華
雕輦鐵鎖降幡助亦有岳州江山思僅在灞橋風雪零
珠屑玉端知七寶之莊嚴片甲一鱗倏具五采之神化
殆可傳已吟袂纔捧征帆遽移特付琬鐫聊當縞贈或
者聞仙畫像供有道士而轉靈仍慮安石碎金爲彼蒼
生而復出寫松牌以紀夢海上山青賦蘭薄以招魂江

樂亭文集續集卷一

序

全

南水碧

謂家實生中丞

輕薄誰驚蛟蜃迴殊魏伯起之嘲才名

獨豔鷓鴣又獲鄭都官之集